

76<sup>TH</sup> CHIN MIPHUN NI (CHIN NATIONAL DAY)  
SAINT LOUIS, MISSOURI

02/17/2024

**Chin Miphun Ni Thawhkehnak**

Mirang nih an rak kan uk lio ah, tlangcungmi pawl hi India mi hna le Kawlmi hna he kan khua sak ning le kan lung put, kan nunphung hna aa dan hi fiang tuk in an rak kan hmuh khawh. Miphun dang kan sinak kha fiang tein an kan hmuh, an kan theih khawh caah a dang tein uknak phung an kan ser piak i Chindhill Regulation Acts in an rak kan uk. Cu ve bantukin Independence zong hi Kawl le India he fonh loin a dang tein pek an rak kan duh. An phan mi cu tlangcungmi pawl hi India le kawl mi hna kut tangah an tla sual te sual lai ti phannak an kan ngeih piak chung cang caah a rak si. Mizo ram kan pu le hna nih Mirang bawipa sinah India he hmun khat teah Independence rak kan pe uh an rak ti lioah hin Mirang bawipa cu a thin a hung tuk i Mizo kan pu cu a bengh an ti. Kannih Kawlram zong Aung San London khua ah Independence a va hal ve lioah Kawlram pumpi huap cain a rak hal caah Mirang nih tlangcungmi hna hnatlaknak tel loin Kawl ti mi min tangah anmah hna Independence cu kan in pe kho lo nanmah ca lawng i hal ko uh an rak ti. Cucaah, Aung San cu a rak kir than i tlangcungmi hna he hmunkhat teah independence cu lak ti dingin Pinlung khua ah Feb-12, 1947 ah sizungzii a rak tuah. Kan pupa hna nih kan luat zokzoknak a si ah cun tiin kawl he hmun khat ah independence cu lak ti dingin hnatlaknak min cu an rak thu. Cuticun 1947, Feb-12 ah Shan, Kachin, Chin ti mi upa pawl i tel in Union of Burma ah hmun khat te ah umti dingin Pinlung khua ah minthutnak an rak ngei. Cu ti cun caan a hung kal i 1948 January ni 4- ah independence cu pek kan rak si.

1948 January 22 ah Laitlang ngiatthlai tu um dingin hnatlaknak an rak ngei i, cu cu January 28- a vawi 7- nak MP (vuanci) pawl meeting ah a thehlulh i cuticun Feb- 5 ah lai tlangah ngiatthlai tu Commission cu an rak dirh. Hi ngiatthlai tu pawl nih Ramuk bawi hna le mi pi hna cu ze i mawzat i tonnak kan Laitlang hmun dang dang ah an ngeih hnuah Laitlang khua pi Falam ah 1948 Feb- 19- 22 tiang mipi i tonnak an rak ngei. Hi Conference pi a ni 20 nak ni bia khiah nak in Ramukbawi uknak cu kal takin mipi nih thimmi Democracy phungning in i hruai dingah lungruual tein votes in bia an rak khiah. Cu ni cu 1950- kum ah Chin Council Affairs nih "CHIN MI PHUN NI" ti ding in hnatlak nak an rak ngei. Cucaah 1951 Feb-20 ah a voikhatnak "CHINMI PHUN NI" cu Mindat khua ah tuah a rak si.

**Chin Miphun Ni Zeitindah Kan Hman Lai?**

Chin miphun cu khuakhat le khuakhat aa do tawnmi aa ral tawnmi kan rak si na in kan pupa hna nih Falam khua i i ton nak an rak tuahnak thawk in miphun u nau khat hmunkhat te ah a tang ti ding kan si ti mi lung rual nak kha ruah bu in.

Hi vulei pi ah hin phunglam le ramri ngeih in khua a sa mi miphun pakhat kan si ve nak theihpeng bu le vawlei zong nih an kan theih i an kan hmuh ve nak ding ca ah.

Kan Pathian nih miphun phunkhat sikhawhna le ram ngei khomi miphun sinak thluachuah a kan pekmi hi theih bu tein CND hi kan sunhlawih i kan lawmh ding ni khua a si.

“Miphun” timi hi kan Baibal chung ah kan hmuh. Pathian nih rian a rak tuan tik ah miphun in rian a rak tuan. Miphun in a rak thim hna i umnakding ah ram le hmunhma a rak pek hna. Hruaitu a rak thimpiak hna i a pakhat nak an hruai tu Moses hi a miphun a dawtnak le a tanhna lungput kha Pathian nih a zumh ca ah Isarel miphun hruaitu ah a rak thim. An tuanbia zoh tikah nihin Chinmiphun nih kan lawh ngai hna? Ram tampi ah an i thek i an phaknak le an khuasaknak hmun poh ah Pathian an i tlaih i an miphun an i tlaih peng. America khuasa mi hna nih an miphun tuanbia kha museum nganpi ah an i chiah i cu cu america i achuak mi an tefa pawl kha an vazoh pi ton hna. Khan tampi chung ah an pupa hna tuanbia le an nunphung an thilthuam nuamhna phunphun an chiah i luh hmasanak khan pawl ah cun nuamhna phun phun a um i hmaipanh ngai le nuam ngai in an lut an chuak. Sihmansehlaw a donghna kbik khan ah an va luh tik ah cun Hitler nih an miphun a rak thahna hna tuanbia an va hmuh tik ah cun an lung a kuai mitthli he an tin. An miphun dawtnak le tanhna an thisen ah a lut. An ram caah rian an tuan i thil tampi an tuah. Nihin an ram chung ah khuasa mi hi million pa 5- hmanh an tling lo nain an ram le miphun kilvenna kding ca ah vulei cung ah ralkap thazang tambik ngeimi an si ve.

CND cu lungrualna in rak thawk mi a si. Cubantuk in kan pupa hna cu anlung aa rual, an idaw, an ral atha, thildik an tanh, zumhawktlak lungput an rak rak ngei. Cuve bantukin kan Baibal ca Phungthluk bia nih a tial mi cu miphun a lian ngan ter tu cu Din nak a si a ti. Din nak nun in kan miphun a lian ngan tertu pumpak pakhat cio kan lungput si hram seh.

### **Nihin Kan Miphun Le Kan Ram Nih Kan Tonmi Le Kan Dirhmun**

Ralhrang nih hriamnam le thahrung hmang in 2021 February 1, ah uknak a lak than hnu in kan ram ah kahdohnak tampi a chuak. Kan miphun chungin nu le ngahchia telh in minung 518 leng an nunnak a liam cang. Mah inn chuah takin ramchung khua dang le hmun dang ah a tli zammi thong 70 (IDPs) leng kan phan cang. Ramleng tiang pet in a tli zammi thong 50 (Refugee) leng kan phan cang. Cu lawng cu si loin inn le lo khangh le hrawhpiak mi hi 2154 leng a phan cang. Cu chungah biak inn 108 a tel.

Cucaah nihin ah kan miphun nih lungruual tein ralkap uknak thalo cu fak piin doh caan a si i miphun caah nunnak a pe cangmi hna an phu kan hlam caan zong a si. Vakok le Chokhleih nun a ngeimi miphun kan sinak cu nihin ah kan langhter caan a si. Kan miphun lungput muru a simi lungrualna he fek tein kan dir chung paoh cu teinak a hmumi Miphun kan si.

Uknak thalo dictatorship in a kan uk tu kan miphun a lamkip in a kan namneh tu a kan that a kan nawng tu kan inn le kan lo a kan duah piak tu Ralhrang cu a rannak bik in kan tei khawhna hnga

le a hram in kan bongh khawhnak dingah CNF/CNA hruainak in CHINLAND COUNCIL cu December 7, 2023 ah Victoria Base ah dirh a si. Victoria Base zong Chinlung tiah a min thlen a si. February 1, 2024 ah Chinland Cozah (Chinland government) le Chinland Hluttaw (Parliament) cu ser an si.

Missouri State, Saint Louis khua ah khua asa mi Chin mi nih Chinland Council cu fek tein kan dirkamh. Kan miphun le kan ram nih zalonnak kan hmuh i kan miphun le kan ram kong ah kan mah tein khuakhan lairelnak kan hmuh tiang kan miphun dothlennak ah kan i tel khawhnak lam pakhat kan ngeihmi chawva (phaisa) peknak in ka rian kan tuan ve lai. ***“God Bless Chinland And Chinland Council”***

*(Ref: CCN)*

Hlei Lian Thang (Hollypa)